

戊八

考槃餘事

戊辰

方集餘事

龍威秘書戊集

第八冊

考槃餘事

明屠隆

考槃餘事卷之三

東海屠隆著

香箋

論香

香之爲用其利最溥物外高隱坐語道德焚之可以清心悅神四更殘月興味蕭騷焚之可以暢懷舒嘯晴窓場帖揮塵閒吟篝燈夜讀焚以遠辟睡魔謂古伴月可也紅袖在側密語談私執手擁爐

焚以薰心熱意謂古助情可也坐雨閉窓午睡初
足就案學書啜茗味淡一爐初熱香靄馥馥撩人
更宜醉筵醒客皓月清宵水絃曼指長嘯空樓蒼
山極目未殘爐熱香靄隱隱繞簾又可祛邪辟穢
隨其所適無施不可品其最優者伽南止矣第購
之甚艱非山家所能卒辦其次莫若沉香沉有三
等上者氣太厚而反嫌於辣下者質太枯而又涉
於煙惟中者約六七分一兩最滋潤而幽甜可稱

妙品煮茗之餘卽乘茶爐火便取八香鼎徐而蕪
之當斯會心景界儼居太清宮與上真游不復知
有人世矣噫快哉近世焚香者不博真味徒事好
名兼以諸香合成鬪奇爭巧不知沉香出於天然
其幽雅冲澹自有一種不可形容之妙若修合之
香旣出人爲就覺濃豔卽如通天燠冠慶真龍涎
雀頭等項縱製造極工本價極費決不得與沉香
較優劣亦豈貞夫高士所宜耶

棋楠香

有糖結棋楠鋸開上有油如飴糖黑白相間黑如墨白如燥米焚之初有羊羶微氣有金絲棋楠色黃上有絡若金絲惟糖結爲佳

角沉香

質重劈開如墨色者佳不在沉水好速亦能沉也有以碎沉香輾煉成大塊以市於人當細辨之

片速香

俗名鯽魚片雉鷄斑者佳有偽爲者亦以重實爲美

唵叭香

一名黑香以軟淨色明者爲佳手指可撚爲丸者妙甚惟都中有之

角香

俗名牙香以面有黑爛色者爲鉄面純白不烘焙者爲生香其生香之味妙甚在廣中價亦不輕

降真香

紫實爲佳茶煮出油焚之

白膠香

有如明條者佳

黃檀香

黃實者佳茶浸炒黃去腥

芙蓉香

京師劉鶴製妙

蒼朮

句容茅山產細梗如猫糞者佳

萬春香

內府者佳

蘭香

以魚子蘭蒸低速香牙香塊者佳近以末香滾竹

棍蒸者惡甚

安息香

都中有數種總名安息其最佳者劉鶴所製月麟香聚仙香沉速香三種百花香卽下矣

龍桂香

有黃黑二品黑者價高惟內府者佳劉鶴所製亦

可

甜香

惟宣德年製者清遠味幽可愛燕市中貨者罈黑如漆白底上有燒造年月每罈二三斤有錫罩蓋

確子一斤一罈者方真

黃香餅

王鎮住東院所製黑沉色無花紋者佳甚偽者色

黃惡極

黑香餅

劉鶴二錢一兩者佳前門外李家印各色花巧者亦妙

京線香

前門外李家第二分每束價二分佳甚

龍樓香

內府者佳

玉華香

武林高深甫所製

煖閣香

有黃黑二種劉鶴製佳

黑芸香

河南短束城上王府者佳

香鑪

官哥定密龍泉宣銅潘銅彝爐乳爐大如茶杯而
式雅者爲上

香盒

有宋剔梅花蕉段盒金銀爲素用五色漆胎刻法
深淺隨粧露色如紅花綠葉黃心黑石之類奪目
可觀有定密饒密者有倭盒三子五子者有倭撞

可携遊必須子口緊密不泄香氣方妙

隔火

銀錢雲母片玉片砂片俱可以火浣布如錢大者銀鑲周圍作隔火尤難得凡蓋隔火則炭易滅須於爐四圍用筋直搨數十眼以通火氣周轉方妙爐中不可斷火卽不焚香使其長溫方有意趣且灰燥易燃謂之靈灰其香盡餘塊用磁盒或古銅盒收起可投入火盆中薰焙衣被

匙筯

雲間胡文明製者佳南都白銅者亦適用金玉者似不堪用

筯瓶

吳中近製短頸細孔者插筯下重不仆古銅者亦佳官哥定密者不宜日用

香盤

紫檀烏木爲盤以玉爲心用以插香

袖爐

書齋中薰衣炙手對客常談之具如倭人所製漏空罩蓋漆鼓可稱清賞今新製有罩蓋方圓爐亦佳

茶箋

茶品

與茶經稍異今烹煮之法亦與蔡陸諸前人不同矣